

Թուղիկոսին, որ ս. Գրիգորի նշխարներից մի մաս տան իրեն. նորա յանձն չառան և ասում էին Թէ ոչ ուրեք երբէք բաշխեալ են նշխարք Գրիգորի և ոչ ումեք ունիմք իշխանութիւն հանել մասն ի նմանէ և տալ քեզ: Իսրայէլ եպիսկոպոսն իւր նպատակին հասնելու համար դիմում է Գրիգոր պատրիկի կնոջ Հայոց Տիկին Հեղինէի՝ օգնութեանը, որ Աղուանից երկրից էր. վերջինիս յաջողում է կաթուղիկոսին համոզելու և ստանալու Ս. Լուսաւորչի ծնօտի մի մասը, որ Իսրայէլ բերում տեղաւորում է Աղուանից Գլխոյ վանք կոչուած մենաստանում: Աւանդութիւն կայ, որ Ս. Լուսաւորչի գլուխն յետոյ տարուել է Իտալիա, ուր նէպօլո քաղաքում պահուում է նա, ինչպէս պատմում է Չամչեանը (Ա. 635), Ս. Լուսաւորչի անուանը նուիրած մի եկեղեցու մէջ:

Այսպէս ուրեմն կանուխ ժամանակներից ըսկսած բաժան բաժան է լինում մեր ս. հայրապետի մարմինը. նշխարների շնորհիւ կանգնում են մատուռներ և վանքեր Հայաստանում և Հայաստանից դուրս: Այդ նշխարներից մէկը՝ Ս. Լուսաւորչի ատամը՝ մի ժամանակ պահուում էր Աւագ վանքում: Թէև այժմ մասունքը չկայ, սակայն մնում է տուփը, որ մի նշանաւոր հնութիւն է համարուում և կոչւում է Տեղ-տափ կամ ըստ Ինճինճեանի՝ Գեղ-Թափ: Սա ձեռքի մը չափ մոխրագոյն փայլուն